



## 種佛手瓜

新曆的正月，提一粒咧欲發芽的佛手瓜來古坑種，想講遮爾仔臭賤毋驚蟲咬閤免啥落肥的菜蔬，像我這款貧憐骨來種上蓋合。埋落去塗跤兜，大體仔一禮拜爾，就正經發穎矣。

第3工開第2穎；第5工旋第3葉，逐工早起時沃水的時陣，我攏暢甲袂顧得。盍會知影對第7工起，新穎恰葉煞無 khuàinn 影去，規個人即時愣愣，仙都想袂曉遮的新穎攏走去佗咧？後來就準我逐工沃，嘛無閣發新芽，規粒瓜仔勻勻仔脯去，賸一領烏銑烏銑閤皺襞襞的外皮，愈看愈感心，無想欲閣種矣。

一個月後，佇梅山的街仔有菜販仔咧賣佛手瓜。向落去揀4、5粒誠嬌款的欲轉來炒三層仔，雄雄擔頭去眼著佇伊的尻川後，園一堆攏發芽毋閣較細粒的。

我問販仔講：「你後壁發穎的，敢欲賣？」伊應講：「這是人客注文的。」

「會使2粒仔賣我無？」話都猶未煞，菜販仔隨拈2粒起來講：「這無欲賣，毋過會使送你。」

就是按呢，我共加買幾若項菜，那秤那閣問講：「我捌種過，毋過才發穎，就隨化去，盍會按呢咧？」伊隨回話講：「少年的，露螺食去的啦！」

「露螺？欲按怎治咧？」「去買一種露螺藥仔，糝佇四箍輾轉，就安矣。」

駛出來梅山街仔欲轉去古坑的路邊有誠濟農藥店，清彩揣一間就入去。號做『螺寶』的藥粉仔無蓋貴，一包才90箍爾。

我先沃水予澹，共藥粉仔糝佇新瓜仔的邊仔，像圓箍仔按呢箍一輾轉透，才穩心仔出去籤仔店買報紙，沿路攏咧懷疑，按呢變敢有應效？

翻轉工，都未食早頓，就先從去菜園仔。佇圓箍仔外，沐著藥粉仔的大細粒露螺四四散散，有袂振袂動死翹翹的，猶有當咧孵瀾蟯蟯趁的。看著按呢，心肝頭有略略仔歡喜，嘛有淡薄仔驚惶。歡喜的是揸著摠頭治露螺，有佛手瓜通食矣；驚惶的是遐爾仔毒的藥仔，敢袂污染咱的塗肉恰水源咧？

好佳哉，露螺興新穎顛倒毋食老葉，『螺寶』用一改就收去壁櫥藏起來。現時的藤桎四界旋，佛手瓜生甲滿滿是，逐工攏有2、3粒通挽，甜閣好食，我有恰意。

作者：藍春瑞

### ☆詞彙學習☆

【臭賤】tshàu-tsiān：(花草)容易繁殖  
【旋】suan：(藤蔓植物的枝葉)迴旋攀爬  
【khuàinn】「看見」khuànn-kìnn的連音；看到  
【脯】póo：蔬菜或水果脫水變乾  
【烏銑】oo-sian：黑色的鐵鏽  
【皺襞襞】jiàu-phé-phé/liàu-phé-phé：皺巴巴  
【向】àn：(頭或上半身)彎下

【擔頭】tann-thâu：抬起頭。  
【注文】tsù-bûn：預定(借自日語)  
【化去】hua--khì：熄滅  
【糝】sám：撒  
【穩心仔】ún-sim-á：安心地  
【懷疑】giâu-gî：懷疑；憂慮  
【應效】：ìng-hāu：效果  
【孵瀾】pū-nuā：冒泡  
【摠頭】tsáng-thâu：頭緒